

ARUWEN LEGISLATURE-UN EWE MUUN CHUUK

AUNUNGATIN MWIICHENAP, AEWIN MWIICH ATAPWANAPWAN, NOV/84 NAMOPUNG NO. 2-119

## EW NOPUNG

A ekkesiwini Annukun Chuuk No. 5-25, ewe Economic Development Authority fan asengesin Enefenin Namoneas, ren an epwe awateta chochoon ewe Board of Directors, me pwan ren ekkoch popun.

Epwe pung me ren ewe Legislature-un ewe Muun Chuuk.

Tetten 1. Ekkesiwin. Tetten 4 me non Annukun Chuuk No. 5-25, won ukukun choon ewe Board of Directors, iei a ekkesiwin ngeni ei ititin:

"Tetten 4. Board of Directors.

1) Forutan. Epwe wor ew Board of Directors non ewe Enefenin Namoneas Development Authority, an epwe wisen tumunu pwan nemeni ewe Authority.

2) Choon.

a) Ewe Board epwe engon-me fomon choon, repwe finita non ei napanap:

i) Nimon repwe finita me ren ekkewe Emwenin Kumi non ew me ew ekkei nimu kumi non Moen Municipality, fiti tipe-ewin ewe Municipal Council:

1. Ichkumi(Iras, Mechitiw, Tunnuk, Pos-Moen);
2. Nikumi(Nepukos, Sefin);
3. Sangkumi(Neauo, Wichap, Epunup);
4. Yongkumi(Penia, Peniesenne); me
5. Kokumi(Nemwan, Eor, Winipis, Nukanap);

ii) Meinisin ekkewe State Senators non ewe kinikinin ewe Authority, repwe chok ex-officio members nge resap tongeni fout;

iii) Ruomon repwe kefinita me ren ewe Fono Magistrate, fiti kapungunon me ren ewe Fono Municipal Council;

iv) Emon monun ewe Moen Council epwe finita me ren ewe Council; pwan

v) Ewe Mayor of Moen Municipality.

3) Niwin. Esap wor niwinin chon ewe Board non ewe Aewin ierin angang, poputa seni ewe atun a pochokun ei annuk. Niwinin chon ewe Board me murin ewe aewin ier epwe foruno me ren pusin ewe Board fan pochokunen 2/3 ar fout.

4) Nangatamen Fansoun Wiiser. Nangataman fansoun wisen ekkewe ra tupuni ekkewe municipalities epwe ukukun ruu ier. Fansoun poputan wiser kewe epwe poputa non ewe ranin aewin mwiich.

5) Aewin Mwiich. Esap mang seni one (60) ran me murin poputan pochokunen ei annuk, ewe Board epwe efisi an mwiich ren an epwe fini noun nouwiis, pwan fori ekkoch an angang. Ewe Senator epwe wisen akkou ewe aewin mwiichen ewe Board, pwan wisen nemeni ewe mwiich tori nupwen fansoun ra kefinita ekkewe wesetan nouwisin ewe Board.

6) Neni mei Poonuno. Ew neni mei poonuno me won ewe Board epwe ammasou usun chok pwan napanapan an finita monun akkomw. Nupwen fansoun a wor ew neni mei poon, ewe Chairman, nge ika ese nomw, ewe a wisen presiding officer non ewe Board epwe esine ngeni chon ewe Board meinisin me ewe municipal government e wisen amosowa ewe neni, pwe a wor neni mei ponuno.

7) Toou.

a) Chon ewe Board repwe tongeni tou seni ewe Board nupwen fansoun ar rese tongeni fiti mwiichen ewe Board fan unungat tettenino chok, ika seni ar rese tufich non wiser, ika rese fori angangen wiser, ika ren foforongaw non ar wiis.

b) Ren an emon chon ewe mwiich epwe tongeni tou seni wisan, epwe ukukun unungat-ne-ruwanuwen (3/4) chon ewe mwiich meinisin repwe tipeew ngeni non ar uttut. Iwe porausen an emon epwe tou epwe akomw for, esap kis seni inik ran me mwen ar repwe angang won, epwe afata non annukun ei Authority, iwe epwe pwan affat meta sakkun tipis ewe emon monun mwiich a fori, pwan iten chon pwarata me pisekin pwarata epwe kawor.

c) Ewe District Court non ewe Muun Chuuk epwe wisen nomw ren ewe pochokun me ani ewe sakkun kapungun katou ese fiti pungun annuk, nge nupwen fansoun a foruta ewe State Court non Chuuk, iwe ii epwene wisen anomwu ewe pochokun ne eani ewe sakkun kapung.

8) Nouwiis. Ewe Board epwe finata seni chon ewe mwiich emon Chairman, Vice-Chiarman me Secretary-Treasurer. Ewe Chairman epwe wisen nemeni mwiichen ewe Board nupwen fansoun mwiich. Nupwen an ese nomw, ewe Vice-Chairman epwe wisen nemenem. Nge ika rese nomw, ese Secretary-Treasurer epwe wisen nemeni. An ewe Board by-laws epwe wisen finata ion epwe nemeni mwiich nupwen ekkei nouwis rese nomw.

9) Mwiichenap. Mwiichenap epwe fis eap kisiseni fan ew non iteiten kuacheer ier, fansoun me nenien mwiich epwe finata me ren ewe Chairman usun epwe affat non ewe by-laws.


10) Mwiich Atapwanapwan. Mwiich atapwanapwan mei tongeni fis me ren chok ewe Chairman, ika pwan seni chon mwiich ren ukukun ew-ne-unungatin chon mwiich non ar tungor, napanapen ei sakkun epwe affat me ren by-laws.

11) Quorum. Epwe ukukun wanimon chon mwiich epwe nomw iwe a tongeni fis ew mwiich me ren mwiichenap ika mwiich atapwanapwan.

12) Executive Mwiich. Ewe Board, fan pungun an by-laws, mei tongeni forata ew an Executive Committee, pwan ukukun chochoon, wisan me an angang.

13) Rekotun Mwiich. Meinsin an ewe Board me ewe Executive Committee mwiich epwe suuk ngeni aramas, nukun chok ika pwe mei wor meetoch mei mwonomwon fan iten porausen emon. Ewe Secretary-Treasurer, nge nupwen ese nomw, emon chon mwiich epwe finata me ren by-laws, epwe wisen tumunu unusen porausen ewe mwiich non fansoun meinsin an mwiich, iwe epwe pwan suuk ngeni public ar repwe katon ika cheki non neni me fansoun, usun by-laws epwe pusin affata, chinoon chok ren porausen emon chon mwiich mei mwonomwon."

Tetten 2. Poputan Pochokunan. Ei Namopung epwe poputa pochokunan fansoun an a kapunguno me ren ewe Kepina, ika fansoun an a pusin winiti annuk won winikapan.

Sain seni:   
Simeon Innocenti, Speaker  
Truk State Legislature

Annetata seni:   
Datasi Albert  
Legislative Chief Clerk

Pwinin maram: Jan 25, 1985

Kapunguno seni: \_\_\_\_\_  
Erhart Aten, Governor  
Truk State Government

Pwinin maram: \_\_\_\_\_